

欽定剿平粵匪方略

欽定剿平粵匪方略卷一百八十 丁巳年

八月初四日

壬子

官文胡林翼奏言黃州官軍自

剿除黃岡縣屬孫家嘴等處賊壘後臣官文咨

令各軍乘勝攻勦偵知黃蘄連界之馬家河等

處賊營碁布星羅非出奇制勝以除之則我軍

動多牽掣

臣

胡林翼遂率唐訓方李續宜審察

地勢分路進剿十八日

臣

胡林翼派仁字六營

由左路進又兩訓義寶信等五營由中路進各以馬隊輔之又派昌營及團勇排列右路爲疑兵而以湘寶三營並信中營隨同副都統舒保馬隊伏中路山陰相機而動寅刻我軍出隊誘戰踰時賊以三千餘人排右路以四千餘賊排中路以七八千賊直撲我左路何紹彩率仁字六營奮力禦之李續宜密派張文煥等分率各

營而自帶湘副中營捲旗息鼓分四枝向左路
伏山而行出其不意奮擊賊腰何紹彩等見賊
將爲我軍所截與馬隊合力圍剿左路之賊大
敗中路賊急揮賊隊衝我中路並援賊左路唐
訓方等奮力擊退而右路賊亦潰臣胡林翼復
督各營勇乘勝追殺直搗賊巢槍礮齊施舒保
統馬隊衝擊鏖戰三時之久連踏賊壘四座我

軍右中兩路見賊老營已破勇氣百倍馬步合力環攻連踏賊壘四十餘座馬家河等處賊壘悉平計是日焚斃溺斃及擒斬者約四千餘人奪獲軍械無算敗賊盡竄蘄水深山我軍追殺十餘里而還是日之捷李續宜料敵決勝隨機應變實堪嘉尙而將士用命則以仁字六營更爲出力現在上巴河以上黃岡境內一律肅清

聞

臣胡林翼現卽提師進駐蘄水臣官文查蘄廣
山深箐密皖逆之分踞四鄉要隘者尙多再得
數大戰以次掃蕩則全楚自臻敕定矣奏入報
同日和春奏言據張國樑咨稱紅花山一處偏
近摩旗山賊壘與虎頭山相離不遠須在此紮
營方能扼要因於六月二十日傳集夫役晝夜

起築塢一夜之力工纔過半賊匪分股來撲均
經我軍擊退隨催夫役將新營築就飭都司王
瑞圖管帶川兵駐守又於山下添築一壘以資
策應亦令川兵駐紮二十一日雨後摩旗山突
出賊匪數千撲我紅花山新營張國樑親帶官
軍馳往應援槍礮頻施逆屍枕藉不可勝數賊
勢大敗經李若珠等橫腰截擊又斃無算惟都

司王瑞圖連次親放大礮斃賊最衆該逆亦以
擡礮回拒洞穿胸臆登時陣亡我軍於酉刻收
隊約斃賊五六百名連日乘勝移營進逼水師
總兵陳世忠等每聞陸路接仗卽率同遊擊葉
長青等各駕師船乘風駛赴金銀二山及瓜州
新河口一帶對準賊船開礮轟擊該逆堅伏不
出東南兩面布置已定惟西面直通金陵沙洲

夾江逆黨與糧藥皆從此出進必須另行設法
亟圖合圍臣和春卽於七月初三日偕許乃釗
親赴鎮江查看地勢非繞出高資逆壘之西度
地安營斷彼外援不足以操勝算十二日令張
國樑余萬清帶領副將王浚等由西面繞至高
資我軍正在紮營逆匪大股出撲張國樑親督
官軍奮力擊勦接戰多時斃賊甚衆該逆仍復

死拒我軍槍礮並進擊倒悍賊數名始行敗退
旋值大雨如注張國樑等帶同官軍冒雨督夫
露處郊野竭一日夜之力成營八座卽派兵勇
駐守仍復晝夜添築以期聲勢聯絡十三日早
鮎魚套口賊船見我軍紮營江邊駛出窺伺經
水師守備賴鎮海管帶各船由北岸揚帆起碇
駛至南岸鮎魚套口施放大礮轟倒江邊逆匪

礮臺數座並擊沈賊划數隻逆匪敗退十五日
黎明大霧迷漫城南逆匪突出千餘人欲撲我
軍營盤經虎嵩林余萬清先後擊退斃賊二百
餘名奪獲軍械數十件查鎮江逆匪踞守極堅
我軍現於高資偏近賊壘紮營多座直抵江邊
金陵水陸外援皆已無路可通三面合圍漸成
坐困之勢連日紮營迎勦先後斃賊不下一千

餘名都司王瑞圖楊冠孫把總黃立紀羅得勝
外委鄭得成均被礮陣亡深堪憫惻應請

旨飭部從優議卹奏入

上諭內閣曰現在和春張國樑均已馳抵鎮江大軍三
面合圍賊援已絕著卽激勵各軍乘勝進擣以期迅
克堅城都司王瑞圖楊冠孫把總黃立紀羅得勝外
委鄭得成力戰陣亡深堪憫惻均著交部從優議卹

和春又奏言據水師吳全美李德麟稟稱六月三十日泥汊賊匪駛出火簞數十座礮划數十隻順流衝下卽督同都司盧起陞等分途截勦連開大礮轟沈數隻頻將火箭火罐打入賊簞焚燒數座把總盧爲霖等駛駕快蟹船衝入賊隊將紅衣賊目槍斃落水並擊倒五色賊旗餘皆驚潰兵勇追勦又擊沈賊划數隻斃賊多名

七月初二日上游賊船鑿擁而來兵勇分途截擊正鏖戰間泥汊河突出賊划數十隻包襲我軍後路徐克明帶船衝擊逆勢不支紛紛逃竄我師合力追勦斃賊甚衆鮎魚套又衝出礮划百餘隻上前迎拒盧起陞黃廣泰左右夾擊連開大礮轟沈賊划甚多統計斃賊三百餘人生擒僞檢點張大來一名賊目五名正法是夜官

軍卽以所獲黃旗號衣誘賊賊蒼黃失措敗遁
入巢兵勇盡力刺殺殲斃尤多約斃賊四五百
名砍取首級三十四顆生擒僞指揮司馬什長
等二十一名訊明正法奪獲僞印礮位船隻三
百餘件初五日鄧紹良派隊赴老鴉山紮營咨
會水陸合攻包抄截擊斃賊不可數計老鴉山
新營業已築就現仍飭令趕緊進剿以期得手

和春又奏言准晏端書咨稱甯國婺源兩處軍情同時緊急浙省三面備敵兵力不敷堵剿請派兵前往援應自應酌量抽撥以資援剿當與張國樑許乃釗面商查有貴州永安營都司閔步璜所帶陝西兵四百七十餘名把總熊定邦所帶揚勝勇二百餘名四川卽補把總鄭國泰所帶樹勇三百餘名共計兵勇一千名均尚精

銳堪以派往奏入均報

同日王懿德慶端奏言汀州府屬甯化一縣尙被逆匪占踞臣王懿德派委汀漳龍道英樸督率兵勇馳抵甯化連日接仗屢有斬獲六月二十二日漳州營守備潘繼文等督兵會合攻擊該逆兩次開城迎拒各兵勇開放槍礮擊斃逆

匪及墮溪死者約二百餘名縣丞樓鳳清等設
伏山坳誘賊過山槍礮往還相持一時之久復
礮斃逆匪七八十名該逆紛紛卻退我軍爭據
山頂用擡礮遙擊各路伏兵齊起短兵相接截
殺賊匪一百餘名生擒僞軍師僞將軍陳得生
張梁材二名訊明正法二十四五等日我軍分
攻東西南三門該匪登城抗拒被我軍擊斃一

百餘名該道英樸等激勵兵勇乘夜急攻將西北兩門竄出之賊殲擒殆盡其東門之賊浮水過河紛竄者復經我軍截殺無數餘逆由江西石城一帶竄逃卽於六月二十六日將甯化縣城池克復該道英樸酌留員弁兵勇駐紮縣城以杜回竄一面分投搜捕清流歸化等縣餘匪臣等查江右長髮逆匪竄擾閩省土匪勾結響

應淪陷郡縣仰賴

福庇兵民同仇敵愾未及三月恢復汀州等處府縣十
城惟甯化一縣被逆負隅日久茲經汀漳龍道
英樸等調派員弁兵勇剋期攻克殲斃逆匪甚
多其在事尤爲出力文武員弁紳士暨傷亡兵
勇俟查明奏懇

恩施獎卹並飛飭各路統兵大臣督率師旅搜捕餘孽

淨殲醜類以期全境敕安奏入

上諭內閣曰此次福建省勦辦江西竄匪三月之內將失陷城池次第克復地方一律肅清辦理尙爲妥速所有在事尤爲出力之文武員弁紳士著該督等查明奏請獎敘其傷亡兵勇並著查明咨部請卹

初五日 癸丑 耆齡奏言據廣東南韶連道吳坤修

等稟報七月初五日各營進攻瑞州府城吳坤

修率彪勇攻北門普承堯率寶勇攻西門劉騰
鴻同劉連捷等率湘勇渡過北岸攻東門直抵
城下各用雲梯奮力仰擊施放火箭噴筒城上
槍礮木石密如雨下我軍奮不顧身前者受傷
後者繼進劉騰鴻親執桴鼓督陣藍翎把總谷
文勝被傷陣亡攻至午刻士卒受傷甚多恐損
精銳始各收隊初六日以後各營不時進攻十

一日夜復大舉攻城普承堯等分率兵勇齊偪城根十二日劉騰鴻移千斤大礮將橋南賊築礮臺攻破拋擲火彈燒斃臺內逆匪無算劉騰鴻身受槍傷仍裹創督戰十三日又攻破橋北礮臺劉騰鴻督隊過橋驟中南門賊礮登時陣亡其弟騰鶴騰鵠仍率勇冒險爭先奮攻愈急普承堯令蕭晷趕往南城幫同攻勦時城內逆

渠僞將軍黃洸亦爲我礮所斃賊衆畏懼乞降
吳坤修普承堯均佯許之以懈賊守是夜我軍
拋擲火彈焚賊城上更棚逆衆大亂普承堯卽
督率各營緣梯登城分途勦洗殺賊不計其數
賊衆縋城逃走吳坤修之彪勇劉國斌之戰船
伏兵齊起悉數殲除其情急投河者均爲水師
擒斬無一走脫共計殺斃溺斃者二千數百人

各營生擒數百名分別訊明處斬難民開釋奪
獲大礮一百餘尊旗械不計其數當卽克復郡
城臣查瑞州府城自咸豐五年冬間被逆首石
達開攻陷踞爲巢穴未能猝下今拔此堅城蕩
滌羣逆首夥悉就誅戮洵足伸

天討而振軍威通計圍攻年餘野戰百餘次攻城三十
餘次我軍受傷及陣亡者千餘名在事統帶各

員備歷辛勤其尤爲出力者相應開列請

旨給予獎勵其餘在事出力各員弁容俟查明另行請
獎各營兵勇俟稍休息卽當分撥進攻撫建協
剿新淦吉安補用直隸州知州劉騰鴻紀律嚴
肅謀勇兼優攻剿瑞郡該員之力居多本擬保
舉知府並加道銜乃功在垂成因傷殞命深堪
痛惜應請

集之卷四
旨飭部將劉騰鴻照道員例從優議卹並於瑞州府建
立專祠藍翎把總谷文勝臨陣捐軀亦請從優
議卹奏八

上諭內閣曰逆賊自五年冬間竄踞瑞州官軍設法圍
攻將府城收復所有尤爲出力之副將普承堯著記
名以總兵用並賞給扎薩克圖巴圖魯名號廣東南
韶連道吳坤修著賞還花翎文童劉騰鶴著以知縣

卽選並賞加同知銜賞戴藍翎從九品劉騰鵠著以
知縣選用並賞加知州銜遊擊劉國斌著以參將補
用其餘在事出力員弁兵勇著耆齡查明保奏補用
直隸州知州劉騰鴻疊被槍傷裏創力戰十三日於
南門督隊中礮陣亡深堪憫惻著從優照道員例議
卹並於瑞州府城建立專祠陣亡把總谷文勝並著
從優議卹以慰忠魂

耆齡又奏言據進賢縣知縣史昌壽稟稱撫州
賊匪由李家渡竄至進賢縣支嶺地方七月初
六日賊衆數千分路來撲志同等營出隊迎擊
另股賊匪由東路抄來寶勇接應遲延以致被
匪繞至我軍之後各營均被焚燬寶勇亦卽潰
散守城兵勇單弱賊匪乘勢撲入知縣史昌壽
被賊刺墜城下經練勇負救得甦臣聞報卽移

會李定太率領兵勇進剿並檄周鳳山督率所部先往三江口堵剿李家渡一路與李定太相爲犄角史昌壽亦馳赴池溪橋邀舉人焦有森集團助剿焦有森先聞縣城有警立帶團勇直抵城下與賊接仗獲勝賊匪敗匿城內李定太派守備萬泰等帶領潯兵取道荏港先進自率勇丁繼往周鳳山亦至三江口該逆知兩路官

兵齊到又畏圍練甚衆卽於十三日全股遁回
撫郡李定太令高泰等進城安撫居民史昌壽
踵至卽將城池收復臣查進賢縣與撫郡犬牙
相錯撫州之賊因乏兵力進勦該逆遂得四出
滋擾現在瑞州府城業已克復該處兵勇卽可
酌調三四千名前赴進賢隨同李定太聯絡鄉
團進勦撫郡殄滅羣醜寶勇營官已革湖南武

岡州吏目吳學鑒接應遲延咎無可辭應請卽
行拏問幫帶寶勇卽選府經歷縣丞鄧國祥請
卽革職進賢縣知縣史昌壽於縣城被匪撲入
雖據邀集鄉團與省兵三路進徧旋即收復尙
知愧奮但城池究已被擾亦請革職仍留於地
方辦理善後防堵以觀後效志同軍等營營官
補用同知鍾世楨等此次失利實由寶勇接應

遲延以致爲賊所襲情尙可原應請將奏准保
舉之案銷去用示懲儆奏入

上諭內閣曰撫州賊匪竄至進賢縣支嶺地方乘勢撲
入縣城旋經官兵收復所有管帶寶勇接應遲延之
已革武岡州吏目吳學璽著卽拏問交耆齡訊明定
擬具奏幫帶寶勇藍翎卽選府經歷縣丞鄧國祥著
卽革職進賢縣知縣史昌壽著卽革職留於地方辦

理善後事宜以觀後效管帶志同軍等營補用同知
鍾世楨等著將前次堵剿出力准保之案撤銷以示
懲儆

初七日 乙卯 福興奏言東鄉逆匪分股竄擾安仁

經臣派令遊擊賴高翔等統帶兵勇前往會同
李元度合力進剿本月初四日我軍前隊甫進
該逆分四股來拒我軍因人數較單當卽扼橋

轟擊賊亦未敢過河初五日李元度添撥精銳
兩營並調集戰船順流下剿整隊齊出該逆偵
知水陸官軍大至乘夜由萬年一路遁去仍留
悍賊堅拒我師各軍分路衝擊乘勢掩殺逆衆
不戰自潰登時轟斃一百數十名我軍追殺二
十餘里現由臣檄調從九品高祥霖一軍進紮
安仁爲扼河而守之計其平江營勇及賴高翔

聞

等兵勇仍分紮弋陽貴溪等處以防爲勦臣現
於二十日起程馳赴弋陽以便就近會合進圖
撫建奏八報

初九日丁巳晏端書奏言江西撫州賊匪於七月

初三日竄至中雲知府畢太鈺等督率兵勇奮
力接仗斬馘頗多初六日賊衆圍偏葵源縣城

勢甚兇悍兵勇因衆寡不敵退駐白沙關初十等日該逆又進犯徽境之清華街張芾飭參將王夢麟等截擊斃賊甚衆嗣復四面圍勦槍斃悍賊百餘名斬獲首級二十六顆內有僞國宗洪春沅一名並生擒多名訊明正法十六日遊擊楊國正等於涼亭遇賊陣斬黃衣騎馬賊目一名殲斃匪黨二百餘名斬首二十餘級餘賊

竄入新建饒廷選督兵扼剿斃賊無算楊國正等又派亭追剿是日共斃賊一千有餘查邇來江省廣饒兩郡軍情並緊饒廷選有督防三衢之責婺源距三衢二百餘里勢難責令親臨督辦楊國正久歷戎行所部兵勇亦堪禦敵臣已咨請饒廷選俟布置羈定仍行回防三衢所有白沙關以外防剿事宜卽歸楊國正接辦在

防官兵統歸節制調度以一事權此次力戰陣
亡之候選知府畢大鈺外委蘇瑞祥儲萬清深
堪憫惻應請

旨飭部從優議卹以慰忠魂奏入

上諭內閣曰賊衆圍偏婺源縣城並進犯徽境之清華
街經參將王夢麟等截擊圍剿斃賊無算勦辦尙爲
得手仍著晏端書督飭將弁將婺源一帶賊匪勦除

淨盡毋令蔓延所有力戰陣亡之候選知府畢大鈺
外委蘇瑞祥儲萬清均著交部從優議卹

晏端書又奏言提臣鄧紹良派副將貴廷芳等
各帶部勇共二千二百名歸蕭知音統帶進紮
老鴉山復派遊擊陶寶登各軍分紮孤山壩等
處以杜蕪湖繁昌賊援七月初五日蕪湖賊數
千人從青山鴈村橋兩路直犯老鴉山其自青

山來者申明照等擊之於十里亭並經鄧紹良
派都司文懋官馳往策應立將逆衆擊退殲斃
三百餘名其自鷹村橋來者經吳全美等分督
兵勇從雙港進剿追擊至蕪湖南街口生擒長
髮賊張施等八名正法斬首二十三級初七日
該逆於四合山江北糾添賊黨三千餘人仍從
五里亭鷹村橋犯老鴉山守備劉廷鼐等帶隊

前進立歿悍賊二名復經蕭知音等奮力進剿
俘斬悍賊十餘名該逆竄撲孤山壩千總洪仙
增等迎頭截擊賊衆大敗而遁是日共斃賊一
百餘名初九日該逆以大股進五里亭又以馬
隊進鷹村橋先後蠶擁而來鄧紹良督飭貴廷
芳等分路迎剿前後夾攻自辰至午接仗三時
連斃黃衣賊目三十餘名殲其賊黨五六百名

落水淹死者無算又生擒僞司馬陳起鵬正法
至青陽一路賊蹤竄突靡常逆首曾姓率領股
匪數千於七月初五日由貴池竄至青陽之南
陽灣周天受派隊分守隘口初八日復親督縣
丞余兆祥等四面截殺連破賊卡二座斃賊甚
衆逆勢大潰榮陞等追過南陽灣又斃悍賊多
名餘匪盡向白砂嶺退竄臣查老鴉山緊接蕪

湖鄧紹良移師進紫業已立定營盤並與水師
聯成一氣是我軍已據上游將來會同江南得
勝之師規取蕪湖當必易於得手青陽爲徽甯
總路周天受屹立一軍洵足壯軍威而寒賊膽
惟萬級嶺紀家嶺楊田埂等處逆匪節次窺竄
雖經秦如虎督兵擊退而防兵尙形單薄鄧紹
良派往虎勇二百周天受派往奮勇三百仍屬

不敷鄧紹良復令遊擊石玉龍許加成兩軍往
援萬級嶺而甯國青陽各軍營又形支絀茲准
和春咨會已撥陝西兵四百餘名揚勝勇二百
餘名樹勇三百餘名合成一千名交都司閔步
璜等管帶前來臣已委弁迎提飭令分赴徽甯
俾資分撥防剿以顧皖南大局奏入報

欽定勦平粵匪方略卷一百八十一 丁巳年

八月十四日

壬戌

官文胡林翼奏言黃州

駐蘄水臣官文調參將李濟清督帶長龍三板等船十餘號駐紮蘄水之蘭溪及對岸黃石港等處杜賊偷越臣胡林翼於七月二十一二等日率各師駐紮蘄水之月山偵知各鄉村踞賊不下數萬又新添安徽悍賊萬餘來援二十三

日我軍安營甫定賊分左右中三路來撲又另
分數支搖旗呐喊勢極兇悍李續宜唐訓方等
分率各軍嚴陣以待俟賊至山腳用礮轟擊團
勇亦奮力齊進斃賊多名餘賊敗竄時馬隊分
三路衝突臣胡林翼亦督親兵且戰且進齊撲
賊壘李續宜與何紹彩會合舒保馬隊夾擊直
擣賊巢槍礮齊施登時火光燭天延燒賊壘六

十三座並賊屯糧之所一燼而空焚殺及淹斃
之賊五千餘名馬步渡河追擊又連破賊壘僞
城五座擒斬賊目僞檢點僞指揮等三十四名
奪獲槍礮器械無數二十四五六等日復分路
出隊馳赴界嶺曹家河等處追勦逆賊望風披
靡又被我軍殲斃二千餘名是役也我軍於數
日之中勦除賊壘六十餘座殺賊七千有奇馬

集賢堂
卷之二
二
隊又追勦百餘里實皆仰賴

聖主威福將士用命現仍乘勝下勦以期節節掃蕩會
攻九江其在事尤爲出力人員相應請

旨給予獎勵出自

聖恩此外出力兵勇應請擇尤保奏伏候

聖裁奏入

上諭內閣曰此次胡林翼親督各兵移營進勦竄賊斬

馘甚多著官文等嚴飭帶兵將弁乘勝下勦節節殲
蕩以期會合諸軍迅克九江府城毋稍延緩知府李
續宜著賞給伊勒達蒙額巴圖魯名號都司劉芳貴
著免補都司以遊擊儘先推補並賞加參將銜千總
黃澤遠著以都司升補並賞換花翎副將張文煥著
賞給勉勇巴圖魯名號守備王載駟唐義訓彭炳武
均著以遊擊儘先拔補並賞換花翎千總彭星占著

以都司升補並賞換花翎其餘在事出力兵勇並著
該大臣等查明擇尤保奏

官文又奏言臣自奉

命督師以來由德安下勦攻克武漢黃州未有寸功特
以仰體

聖主知人善任之意講求御將之方故得仰仗

天威大張撻伐數年以來楚北軍威大振都興阿老成

持重楊載福老謀深算李續賓足智多謀多隆
阿舒保謀勇兼全所向無前李續宜曉暢兵機
勇略冠軍厥功甚偉臣隨時體訪該六員皆心
地純正經濟匡時足當大任相應據實密陳可
否

加恩量用之處出自

天恩奏入

上諭曰俟楚北軍情稍鬆大兵東下之時朕酌量擢用以期得力

同日駱秉章奏言頃准江西撫臣鈔送克復龍泉縣城摺稿專據副將周鳳山稟報於桂東一軍疊次攻剿及用間誘降收復城池實在情形未經聲敘明白臣現確知其詳不敢不爲

皇上一一陳之桂東一軍劉拔元胡兼善吳齊源等二

月二十五至三月十四等日疊次勦賊殲斃甚
多十六日大破賊於君子垵燒賊營三座斃賊
四百餘名二十八日追賊石圍四月初四日勦
賊五斗江共斃賊五六百而龍泉北鄉賊氛漸
熄吉安援賊圍撲城南老營情形萬緊胡兼善
聞警往援行抵藻林距老營尙二十餘里聞知
縣劉拔元等已出隊擊賊被賊圍攻衆寡不敵

血戰捐軀矣胡兼善率勇星馳行抵城南飛稟
求援臣卽飭千總蕭紹鈴率所部勇六百急赴
龍泉又調桂東團練黃由謙等率團勇五百先
往援應一面札飭吉安各軍就近分軍助剿而
以劉拔元所帶中營之勇併歸胡兼善統帶初
十日賊衆六七千來撲營盤胡兼善等擊卻之
斃賊五百餘名二十三四五月初一等日賊衆

萬餘屢次出撲均經胡兼善等擊退初十日周鳳山始由萬安率鳳營抵龍泉城北一帶安營是日蕭紹鈴及桂東團練黃由謙等各率勇抵龍泉西南一帶安營連日派隊環攻城賊固匿不出出亦旋退二十七日萬安縣賊八百餘人來援龍泉周鳳山胡兼善等各派隊迎勦擒斬殆盡閏五月十四夜胡兼善營中幫辦武生胡

達善巡哨至西門濠邊獲逃賊林蘋信至營訊
以城中虛實據稱城內男婦大小約七八千米
糧不乏賊首爲武舉鍾起鳳廩生鍾毓靈等而
尤以監生陳邦烈舉人張謙爲最胡兼善恐渠
魁漏逸擬設計誘致之遂授以密計縱令入城
十七日林蘋信縋城而下言城中諸賊現尙疑
信參半胡兼善仍縱之去並諭令須偕賊首數

人來次日賊首鍾起鳳等來營胡兼善仍好言
撫之令鍾起鳳鍾毓靈薤髮留營鍾辰學仍留
髮與林蘋信復入城二十一日陳邦烈張謙亦
至並有賊目劉相桂隨之胡兼善佯爲慰諭將
七犯分羈各營許於二十四日棄械出城就撫
二十二日胡兼善等同詣周鳳山營密告該首
逆等均經誘出豫擬傳單請其分諭各營一律

遵照某起賊由某門出歸某營看守防護聽候
分別查辦賊出之後不准兵勇入城搶取財物
違者治以軍法周鳳山始知誘致之詳胡兼善
歸營後令張謙等告知城中各賊准於二十四
日卯刻出城屆期城內之賊疑懼未化賊首張
謙等願再致信城賊勸其速來是夜賊首劉金
輝羅齋公劉名典等希圖夤夜偷竄適幫辦吳

齊乙等巡哨至拏獲到營胡兼善仍釋勿誅復遣入城五鼓林預信又引出賊首鍾有漢溫日新陳邦英而劉金輝羅齋公劉名典三犯亦隨之出二十五日胡兼善等列隊各門城內賊衆按門棄械而出各營憤其抗拒日久除婦女老幼分別省釋外概與駢誅二十六日胡兼善始提首逆鍾有漢羅齋公溫日新陳邦英劉名典

劉金輝正法二十七日又提首逆張謙陳邦烈
鍾起鳳鍾毓靈劉相桂五犯磔死惟林蘋信卽
林崧生鍾辰學兩犯胡兼善等許以帶罪立功
稟請批示辦理臣飭令妥爲安插以示法外之
仁此收復龍泉縣城之確實情形也周鳳山於
收復龍泉縣城後先發稟報任意欺飾當城賊
二十五日出城之時各營祇列隊城外並無攻

城之事乃捏稱派隊環攻緣梯登城奮力巷戰
在城中分路截殺等情賊首羅齋公本萬安著
名齋匪劉金輝本龍泉起事首逆經胡兼善於
復城後次日提出正法乃捏稱羅齋公於入城
時殺斃劉金輝改過自新請免死罪留營效力
至首逆張謙陳邦烈鍾起鳳鍾毓靈等原係胡
兼善遣降賊林潢信誘致到營乃該副將稟稱

胡兼善之勇其中常有兄弟在城爲賊又有哨
官陳姓與賊逆張謙有師生之誼顯係心懷忌
嫉希圖要功臣前於該副將稟報克復龍泉時
已深疑其不中情事大加駁飭以胡兼善等必
兼稟江西彼此互勘是非自明不料胡兼善未
及具稟江西該副將得以任意捏造虛詞肆其
欺罔現據管帶湘勇候補道王鑫就近體訪稟

請查辦所稱該副將欺飾要功等情與臣所聞
大略相同仰懇

飭下江西撫臣查明更正從嚴叅辦以明賞罰而勵軍
心至由湖南陸續調赴龍泉各營紳勇在事既
久頗著微勞可否由臣覈明彙案保獎之處出
自

聖裁

駱秉章又奏言據王鑫稟報自勦敗廣昌縣古
夏東山壩巨股賊匪後賊之竄踞頭陂者旋竄
廣昌縣六月十七日王鑫拔營追之賊分五路
拒敵官軍亦分路進勦賊大敗走躡蹤緊追忽
逆首僞國宗楊姓率衆萬餘自甘竹來接應敗
賊回拒都司張騰霄躍馬衝鋒潮勇一齊猛撲
賊復大敗追至南豐縣界甘竹地方始行收隊

是戰斃賊約近三千生擒悍賊一百十三名回
軍廣昌縣城而前派赴樂安之千總朱惟堂亦
與張騰霄及知縣孫效曾於十九日收復樂安
縣城王鑫方擬直擣撫州建昌兩郡忽吉安城
賊攻陷周鳳山營盤其趙煥聯劉培元兩營亦
因而被陷僅吉字營全軍無損退保安福縣城
王鑫聞警遂輟擬建之行還軍永豐縣屬藤田

按兵觀釁七月初八日朱惟堂飛稟僞國宗洪
楊諸逆率撫建賊數萬竄宜黃崇仁兩縣將趨
樂安王鑫得報捲甲星馳次日巳刻抵樂安縣
城偃旗息鼓令賊不覺一面暗催團練聽候調
遣十一日未刻援賊八九千人已至南門外距
城僅半里王鑫發暗號伏兵四面齊出大呼猛
撲賊駭而奔我軍窮追四十餘里至甘泉墟計

共斃賊五六千始收隊十二日王鑫親率所部
出太平市甫行十五里賊前隊六七千已到王
鑫分所部擊之賊大敗追至太平市賊大隊二
萬餘盡出接應各勇大呼衝擊追殺三十里至
客馬塘是戰斃賊四千二三百名而竄伏山林
爲團丁搜殺者亦二三千時僞國宗楊逆有衆
三萬尙屯林頭地方賊之敗回者往與會合十

四日王鑫出隊擊之賊列大隊於草岡左右張
兩翼來迎王鑫爲長蛇陣偪之縱勇奮擊噴筒
槍礮齊發復令藤牌數十從後滾出揮刀亂斫
賊大奔潰窮追三四十里始回軍至崇仁屬之
鳳岡墟宿焉是戰殺賊一萬二三千人生擒四
百餘名王鑫擬乘破竹之勢進規撫建然吉安
敗後未能圍攻設令城賊逸出肆擾則一軍孤

懸四面受敵餉道堪虞該員一軍援勦江西自
擊滅水東至太平市之戰共獲大捷十二斃賊
四萬數千江西大局賴有轉機正宜加意保護
俾獲殄寇藏功以紓

聖慮此軍月餉軍械子藥臣與總局司道籌商按時措
解接濟俾得一意圖成無憂缺乏維是道路相
距愈遠近自吉安官軍潰挫時有梗阻之虞現

在解餉兩批未知能否徑達合無仰懇

皇上飭下江西撫臣儘遇湖南委解未到該軍餉項匱乏速由江西省局籌解以資接濟

同日兵科給事中李鶴年奏言臣近閱邸鈔六月二十日前任侍郎曾國藩奏請開缺守制一摺奉

上諭著照所請准其先開兵部侍郎之缺暫行在籍守

制等因臣維曾國藩統兵數載屢著戰功迨追賊至
江右後間有小捷現以該省大局而論上吉安
下九江旁撫建久爲賊踞臨江瑞州二郡因水
師圍剿稍不敢逞而陷溺已深克復無日饒州
廣信一帶時陷時復賊蹤出沒無常省城朝不
保夕形同孤注該侍郎終制一節屢蒙

皇上逾格鴻慈賜金給假褒獎慰留且有當爲天下後

世所共諒之

諭會國藩宜如何銜恤撫膺瀝血圖報而乃一再瀆陳
定以終制爲守經現聞粵西賊復蠢動湖南脣
齒相依萬一有警會國藩能閉門讀禮如安居
無事之時乎至謂才難宏濟心抱不安當前年
武漢克復凱奏飛章該侍郎將略優長業有明
驗自當乘機進剿一鼓蕩平上紓

宵旰之憂下慰軍民之望然後退而守制且補前次未
終之制雖一再奪情誠如

聖諭當爲天下後世所共諒也臣愚擬請
飭下該侍郎仍遵前奉

諭旨迅赴江西軍營督兵勦賊俟全境肅清順流東下
與皖南江左聯師克復東南各境同奏膚公則
致身報

國全忠卽以全孝矣均奏入

上命軍機大臣傳諭駱秉章曾國藩曰王鑫一軍軍餉已諭令耆齡速籌協濟周鳳山於克復龍泉縣城有冒功情事並已諭令耆齡查辦至湖南派赴龍泉之官紳兵勇從征日久著有微勞卽著駱秉章查明保奏丁憂侍郎曾國藩前經降旨准其暫行在籍守制儻江西軍務緊急或他省有需人之處仍著候旨前

往據給事中李鶴年奏請飭曾國藩仍赴江西及時
圖報等語軍務奪情原屬不得已之舉朕非必欲該
侍郎卽入仕途然如該給事中所奏亦可見移孝作
忠經權並用公論自在人心現在江西軍務有楊載
福統帶雖無須曾國藩前往而湖南本籍逼近黔粵
賊氛未息團練籌防均關緊要該侍郎負一鄉重望
自當極力圖維急思報稱

上又命軍機大臣傳諭耆齡曰前據耆齡奏已革副將

周鳳山督兵克復龍泉縣城當經降旨將該員開復原官遇缺卽選並賞換花翎矣本日據駱秉章奏龍泉之克係由訓導胡兼善等誘致首逆該逆等開城出降其時各路兵勇均祇列隊城外分別斬釋並無攻城情事而周鳳山捏稱派隊環攻緣梯登城奮力巷戰在城中分路截殺等情首逆羅齋公劉金輝均

係胡兼善先期誘致復城之次日始行正法而周鳳
山捏稱羅逆於八城時殲斃劉金輝請免死留營且
稱胡兼善之勇有兄弟在城爲賊哨官陳姓與首逆
張謙爲師生等語該副將心懷忌嫉欺飾要功旣經
駱秉章訪得實情著耆齡卽行確查嚴叅據實更正
以懲欺冒耆齡未經據胡兼善等稟報以致無從詳
悉亦毋所用其回護王鑫一軍擬由崇仁進剿撫建

湖南所解兩批餉銀因吉安敗後道路梗阻恐一時不能徑達請飭江西酌量接濟等語並著耆齡將王鑫軍營需用餉項軍械子藥先由江西省局籌解接濟毋使稍有缺乏

駱秉章又奏言候補道王鑫馳勦吉安水東援賊疊獲勝仗正擬先勦樂安縣藤田地方忽探報賊目僞將軍潘姓楊姓及蕭復勝率賊數萬

續由甯都來援吉安距沙溪不遠王鑫以賊衆已近沙溪則吉安可危而藤田後路亦梗遂輟樂安之行於十九日率四成隊一千二百人由藤田馳赴沙溪二十一日有賊萬餘前來搗戰其氣殊驕王鑫靜以待之密令王文瑞等分設伏兵王文瑞先與賊遇斬首二百餘賊遂紛紛敗走王鑫從左路追之圍賊山坡殲斃六七百

名官軍追至韶源賊衆駭走王鑫縱火徧燒村壘一面分五路急追之至上固隘口賊返戈抗拒官軍直前衝突則又鳧水敗逃官軍復追過河至貓公嶺始收隊而返是日斃賊約兩千餘生擒賊數百破賊壘三十餘處旗幟軍械輜重山積敗賊竄至甯都州屬之釣峯收合餘黨衆尙數萬王鑫念此股不急剿除終爲後患遂連

日拔營追之二十六日令王開化等分路進剿
自率兩旗勇由中路進行近釣峯見該逆羅屯
蟻聚村墟皆滿墟前近水兩岸徧紮賊營王鑫
令先攻墟內之賊王文瑞等由墟後包抄王鑫
親督弁勇由街口殺入旗長蕭名聲等冒險直
衝立斬悍賊數十該逆自相踐踏死者數百各
勇直前亂砍斃賊無算陣斬僞總制廖逆追出

街口餘賊將向江洲逃竄適王文瑞從街口抄
來圍而殲之官軍之潛襲賊營者復縱火焚巢
賊折奔江洲官軍緊追斃賊二三百名王鑫令
王文瑞等乘勝齊進同時縱火賊被偪溺斃者
無數賊目蕭復勝策馬而渡湘勇李文翊斬之
而奪其馬約共殺賊二千六七百名救出婦孺
難民約近萬人而官軍一千二百人無一傷亡

者王鑫軍至小源適會匪頭目謝芸標一股竄至廣昌縣屬頭陂地方賊目偽國宗伍復勝率衆數千由廣昌竄至會於古夏圖擾甯都王鑫率衆襲之六月初一日抵古夏賊衆負山面溪而營王鑫令張運蘭等帶旗勇伏於山後自率親兵十餘騎至溪邊誘之賊見王鑫護從人少急分數路躡淺而渡王鑫退至山坡鼓聲大震

山後伏兵突出賊反旗而奔張運蘭之勇已衝
渡水南抄出賊後官軍前後夾擊斃賊數百餘
賊潰竄王鑫縱勇窮追沿途斬殺七八百名是
役共斃賊一千三四百名生擒僞總制楊洸蘋
及賊目數名初二日福建敗賊回援吉安前隊
已抵東山壩王鑫令王文瑞等由右路沿河而
進親督王開化等過河由左路進初三日右路

之勇已抵坪田張運蘭復分各勇爲三路賊覘
官軍人少排列以待官軍奮威衝殺斃賊百餘
賊始敗潰官軍一面追賊一面圍住該村賊黨
衝出者盡爲官軍所殲並陣斬賊目張棕相曹
信照於馬上餘賊敗潰王鑫督官軍由左路進
離東山壩里許適賊聞右路之敗蒼黃鼎沸王
鑫令王開化等急擊之賊大敗走官軍夾擊斃

賊四五百名王鑫令各營分路窮追斬賊目陳
耀南餘賊辟易張運蘭殲賊大半共計斃賊三
千餘名據王鑫稟僞國宗楊逆後隊賊衆二萬
餘已抵廣昌縣之頭陂地方相距僅三十里僞
國宗洪逆亦來會合恐尙有數次大戰而撫建
兩郡之賊聞尙有十數萬之多樂安新淦亦均
有大股屯踞擬卽相機酌辦次第翦除臣惟王

鑫自馳勦水東援賊以來月餘之久轉戰數百
里前後屢獲大捷而所部湘勇僅有三千酷暑
遄征勞頓殊甚況賊匪多至百倍近更添由閩
回竄巨股誠未可視之太輕致有他慮現飭在
籍都司王開傳千總張廣勝等迅募湘勇千名
陸續前赴王鑫行營聽其挑補更換並札飭管
帶桂東勇之訓導胡兼善於龍泉軍營挑精勇

五百馳往助剿奏入報

二十四日

壬申

德興阿翁同書奏言瓜鎮賊情窮

蹙臣等慮其日久生變定計逐日分路進攻一

面密飭陳國泰督帶舟師併力夾擊並咨和春等定期會剿自七月二十八日起至本月初四日共攻五次臣德興阿親督鞠殿華等每次均

於寅刻進隊適水礮臺工竣因飭護運大礮三座直抵四里鋪陳家灣列隊參將趙樹棠等督兵開礮向賊轟擊賊匪亦運礮出巢隔濠對擊俱經我軍用大礮轟退約斃賊十餘名陳國泰督率紅單戰船於二十五日駛近瓜州開礮轟擊燬賊大糧船一隻嗣於二十八日至本月初五日均乘風進擊並開放六千斤大礮擊沈小

船二隻淹斃賊匪數名泊承陞陳世忠於初四
日會督艇師駛過鎮江至瓜州新河口擊塌賊
隄一處初七日瓜州賊匪數百向西竄突意圖
襲營行至吳家樓伏兵猝起大呼賊匪驚擾猶
敢抗戰不退適勇目孫文友帶勇由小蘆莊涉
水冒險斜衝賊隊賊始回竄轟斃及溺死者多
名其窺伺龍灣汊小塘橋之賊均經富明阿設

法擊退斃賊多名臣德興阿復於初十十一等
日運礮進攻擊倒望樓一座城垛數處該逆每
日出賊百餘名隔濠誘戰一經擊回卽堅匿不
出惟以大礮拒守現在張國樑駐紮高資如能
斷賊外援則雖江北兵單尙能遏其奔竄惟據
報南岸棲霞山頂每夜舉火是金陵逆黨尙思
冒死下援儻因高資屯駐重兵不能竄越難保

不窺伺江北而逆首石達開素多詭計聞欲分
兩路下竄一擾江南一擾江北又有欲竄滁州
圖攻六合揚州等語臣等竊念石逆現在安營
屢次揚言下援固恐其聲東擊西尤防其先聲
後實臣惟有督飭兵勇申嚴紀律並令浦口六
合各營嚴密防維如有警報立即援應至瓜州
賊勢已窮即當約會南軍彼此緊攻迅圖克復

奏八

上命軍機大臣傳諭德興阿翁同書曰德興阿等所稱
疊次水陸環攻獲勝情形不過小有斬擒卽行收隊
賊匪旣未大受懲創克復仍屬毫無把握若必待賊
匪竄出始行勦擊則彼必藏匿堅守以老我師何時
始能搗其巢穴著該大臣等嚴飭將士奮力進攻志
在必克毋再遷延時日致生他變至傳聞石逆遣黨

分路下竄係聲東擊西之計亦未可知惟賊情詭詐
自當於浦口六合等處嚴密設防現在南岸大兵雲
集惟江路未絕接濟該大臣等卽一面督飭水師斷
其江中援應一面激勵將士約會南岸諸軍同時並
舉使逆匪不能兼顧不但瓜州可克並可遙作鎮江
聲援

二十九日

丁丑

和春奏言鎮城逆匪拒守極堅並

將城身加高數尺爲負嵎計臣飭各營轟擊將
南水關城垛轟塌丈餘臣與張國樞督同余萬
清等帶領兵勇馳抵城濠正在拔樁前進東北
兩門突出賊黨一二千名分股抄來王紹奎等
分途擊勦王浚李若珠各帶火槍隊分兩翼抄
擊燒斃極多適南水關又出賊千餘經魯占鼐
等兵勇橫衝截殺殲斃不少餘俱潰敗入城約

斃賊四五百名七月二十四日派隊分攻東門
及東北隅南水關虎頭摩旗等山賊營南門南
水關各出賊七八百人直前衝撲我軍且戰且
走誘至山後虎嵩林等帶領伏兵攔腰夾擊盡
力刺殺立殲多名該逆紛紛敗退虎頭摩旗兩
山又各出賊千餘金山亦出數百人飛奔來援
經文祿等迎頭直擊斃賊甚衆旋即敗走突有

黃衣騎馬賊目揮衆并死抵抗兵勇齊進槍斃
騎馬賊餘卽驚潰我軍追殺槍斃齊施計斃賊
三四百名八月初二日摩旗虎頭兩山賊匪各
出數百人直撲四川營盤經王夢熊在營內以
大礮轟擊倒斃甚多復經出營追殺約斃賊百
餘名初四日金山虎頭山各出賊數百人分途
來撲虎頭山之賊經魯占鼇等率兵勇夾擊立

斃數十名金山之賊經泊承陞等開礮轟擊該逆卽退敗入巢該逆旋於高資七擺渡偷築營壘張國樑督同王浚等帶兵過河奮勇直前疊放火器該逆自相驚亂踰牆而逃兵勇乘勢搶進盡數砍殺遂將賊營三座立時奪獲毀爲平地初十日東北風大作泊承陞陳世忠趕駕艇船分隊前進擊倒沿江賊樓二座礮臺一座午

刻新河口一帶駛出賊划二十餘隻陳世忠分
船迎剿擊沈划船三隻燒燬賊船五隻餘俱逃
遁八月初七日淳化鎮沙子岡等處聚集逆匪
千餘意圖擄糧傅振邦派鄧聯科等帶兵馳抵
該處分途齊進用擡礮連環攻擊殲斃二三百
名十一日逆匪又出千餘分三股而來官軍三
面兜擊逆匪紛紛倒地隨卽敗逃我軍追擊死

者尤衆約斃二百餘名七月二十四日吳全美
督同郭定猷等分駕紅單拖層快蟹各船直攻
蕪湖石壘以大礮轟擊賊營房屋倒塌數座小
河南突出礮划十餘隻飛駛抵敵官兵遂連拋
火彈繼以大礮沈碎多隻斃賊一二百名奪獲
賊划二隻槍礮多件臣現在督飭各路兵勇趕
緊攻剿迅圖克復奏入報

同日福濟鄭魁士奏言廬州巢湖三板戰船現
已造成十隻工料尙屬堅實巢縣逆匪由金陵
調大礮船多隻駛入湖西窺伺拒敵八月初十
日賊船由黑石鰲潛溪河上岸擄糧肆擾臣飭
都司黃國堯等帶船出隊並令把總羅福齡等
分帶兵勇夾岸接應黃國堯范玉林帶領戰船

首先衝鋒阿克敦對岸施放擡槍斃黃衣賊一
名賊船連環開礮我軍水師冒煙突入愈偏愈
近擊沈賊長龍船一隻逆衆梟水而逃餘賊抵
禦不住開船南竄查戰船僅成十隻試行有效
仍飭鳩材覓礮趕緊添造以冀肅清湖面進剿
巢城又據總兵音德布函稱江南來賊二千餘
在七里橋等處築營擄掠官軍奮勇進剿當將

賊卡二十座燒燬其太陽橋一路官軍亦斃賊
多名奪毀賊船三隻搶獲擡槍刀矛多件又舒
城縣知縣甘文潤稟報督勇擊賊屢次獲勝桐
六賊援大股萬餘分路撲營勢極兇狠各勇奮
力開槍斃賊甚夥該縣帶隊直前各營一齊出
隊伏兵四起奮力會攻擊退西路之賊復擊東
路三股賊眾皆披靡奔走立刺黃衣賊目十餘

名斃賊二百餘名該逆屢退屢進各勇環擊殲斃賊匪千餘名餘衆潰逃生擒僞將軍沈姓僞指揮何姓等多名臣當將尤爲出力員弁紳勇存候彙保並令加緊攻勦迅殄逆氛奏入得

旨允行

三十日

戊寅

官文都興阿胡林翼奏言官軍由蘄

水進勦賊衆逃回宿太者約十餘萬而黃梅小

池口僞城踞賊抗拒如故臣官文咨行楊載福
都興阿等速拔小池口僞城撤其犄角臣胡林
翼督所部各營並李續賓唐訓方等湘勇由上
游蘄水蘄州而達廣濟黃梅節節搜勦勢如破
竹焚燬賊巢擒斬逆黨不可勝數八月初四日
更餘臣都興阿令多隆阿鮑超各挑馬步隊伍
分路潛進先襲燒其後山賊壘我兵四路衝擊

羈斃及落河淹死之賊甚多馬步各軍連夜追
剿計沿途殺賊三千餘生擒百餘名正法奪獲
大礮六十餘位擡槍器械無算天明追至桂家
畝渡河橋復踏毀賊壘十餘座維時黃梅境內
已漸肅清僅小池口賊窟尙死守待援也臣胡
林翼遂令楊載福等移營進逼晝夜環攻連毀
賊堅壘數處十三十四等日楊載福李續賓等

各營四面環攻十五日風雨大至該逆猶從城
上暗施槍礮而我軍奮勵愈甚臣都興阿又派
馬隊施放火箭城內賊篷登時火起煙焰迷天
各勇四面俱上該逆捨命狂奔被我軍截殺無
數奪門而出者復經巴克坦布等率馬隊分路
窮追至一百八十餘里斬殺殆盡城內被礮擊
死之賊堆積如山查黃梅小池口與潯城隔江

對峙爲江皖入楚咽喉重地該逆踞此險要以
通皖賊之聲援資九江之犄角今仰仗

聖主威福將士齊心用命得以拔此僞城盡殲醜類全
楚肅清實足以彰

天討而快人心現卽派軍駐紮小池口以固全楚門戶
探悉九江逆衆倍嚴守禦援賊日增臣等惟當
督飭各軍相機進取迅掃逆氛所有在事出力

員弁兵勇可否擇尤保奏出自

恩施奏入

上諭內閣曰官軍掃蕩斬黃賊巢攻拔小池口其逃竄
餘匪復分路窮追斬殺殆盡全楚境地一律肅清剿
辦甚屬得手著官文督飭在事文武乘此聲威攻克
九江並分兵追剿逃竄宿太股匪以期迅掃餘逆疏
通江路所有此次出力員弁兵勇著准其擇尤保奏

候朕施恩